

千字文

[梁] 敕员外散骑侍郎 著

天地玄黄，宇宙洪荒。
日月盈昃，辰宿列张。

寒来暑往，秋收冬藏。
闰馀成岁，律吕调阳。

云腾致雨，露结为霜。
金生丽水，玉出昆冈。

剑号巨阙，珠称夜光。
果珍李柰，菜重芥姜。

海咸河淡，鳞潜羽翔。
龙师火帝，鸟官人皇。

始制文字，乃服衣裳。
推位让国，有虞陶唐。

吊民伐罪，周发殷汤。
坐朝问道，垂拱平章。

爱育黎首，臣伏戎羌。
遐迩一体，率宾归王。

鸣凤在竹，白驹食场。
化被草木，赖及万方。

盖此身发，四大五常。
恭惟鞠养，岂敢毁伤。

女慕贞洁，男效才良。
知过必改，得能莫忘。

罔谈彼短，靡恃己长。
信使可复，器欲难量。

墨悲丝染，诗赞羔羊。
景行维贤，克念作圣。

德建名立，形端表正。
空谷传声，虚堂习听。

祸因恶积，福缘善庆。
尺璧非宝，寸阴是竞。

资父事君，曰严与敬。
孝当竭力，忠则尽命。

临深履薄，夙兴温清。
似兰斯馨，如松之盛。

川流不息，渊澄取映。
容止若思，言辞安定。

笃初诚美，慎终宜令。
荣业所基，籍甚无竟。

学优登仕，摄职从政。
存以甘棠，去而益咏。

乐殊贵贱，礼别尊卑。
上和下睦，夫唱妇随。

外受傅训，入奉母仪。
诸姑伯叔，犹子比儿。

孔怀兄弟，同气连枝。
交友投分，切磨箴规。

仁慈隐恻，造次弗离。
节义廉退，颠沛匪亏。

性静情逸，心动神疲。
守真志满，逐物意移。

坚持雅操，好爵自縻。
都邑华夏，东西二京。

背邙面洛，浮渭据泾。
宫殿盘郁，楼观飞惊。

图写禽兽，画彩仙灵。
丙舍傍启，甲帐对楹。

肆筵设席，鼓瑟吹笙。
升阶纳陛，弁转疑星。

右通广内，左达承明。
既集坟典，亦聚群英。

杜稿钟隶，漆书壁经。
府罗将相，路侠槐卿。

户封八县，家给千兵。
高冠陪辇，驱毂振缨。

世禄侈富，车驾肥轻。
策功茂实，勒碑刻铭。

磻溪伊尹，佐时阿衡。
奄宅曲阜，微旦孰营。

桓公匡合，济弱扶倾。
绮回汉惠，说感武丁。

俊义密勿，多士实宁。
晋楚更霸，赵魏困横。

假途灭虢，践土会盟。
何遵约法，韩弊烦刑。

起翦颇牧，用军最精。
宣威沙漠，驰誉丹青。

九州禹迹，百郡秦并。
岳宗泰岱，禅主云亭。

雁门紫塞，鸡田赤城。
昆池碣石，钜野洞庭。

旷远绵邈，岩岫杳冥。
治本于农，务兹稼穡。

俶载南亩，我艺黍稷。
税熟贡新，劝赏黜陟。

孟轲敦素，史鱼秉直。
庶几中庸，劳谦谨敕。

聆音察理，鉴貌辨色。
贻厥嘉猷，勉其祗植。

省躬讥诫，宠增抗极。
殆辱近耻，林皋幸即。

两疏见机，解组谁逼。
索居闲处，沉默寂寥。

求古寻论，散虑逍遥。
欣奏累遣，戚谢欢招。

渠荷的历，园莽抽条。
枇杷晚翠，梧桐蚤凋。

陈根委翳，落叶飘摇。
游鹄独运，凌摩绛霄。

耽读玩市，寓目囊箱。
易轡攸畏，属耳垣墙。

具膳餐饭，适口充肠。
饱饫烹宰，饥厌糟糠。

亲戚故旧，老少异粮。
妾御绩纺，侍巾帷房。

纨扇圆洁，银烛炜煌。
昼眠夕寐，蓝笋象床。

弦歌酒宴，接杯举觞。
矫手顿足，悦豫且康。

嫡后嗣续，祭祀烝尝。
稽颡再拜，悚惧恐惶。

笺牒简要，顾答审详。
骸垢想浴，执热愿凉。

驴骡犍特，骇跃超骧。
诛斩贼盗，捕获叛亡。

布射僚丸，嵇琴阮箫。
恬笔伦纸，钧巧任钓。

释纷利俗，并皆佳妙。
毛施淑姿，工颦妍笑。

年矢每催，曦晖朗曜。
璇玑悬斡，晦魄环照。

指薪修祜，永绥吉劭。
矩步引领，俯仰廊庙。

束带矜庄，徘徊瞻眺。
孤陋寡闻，愚蒙等诮。

谓语助者，焉哉乎也。